



Jahresbericht vom Hauptjugileiter

Das Jahr 2025 hat wie immer mit dem Seeländischen Spiutag gestartet.

Das Jahr sime mit 5 Ball über die Schnur Mannschaften und unserem Volley-Team am Start gseh. Für eis vode 5 Teams hets bis i Viertelfinalem glängt wosisech aber leider gäge Worbe hei müesse gschlage gä. D Trainings hei jetzt neuerdings chlei meh dr Fokus uf Fang und Wurftechnik und im 2026 rumemer ds Podest komplett ab.

Witer ischs gange mit de Visana Sprints und Mille Gruyère in Lyss wo d Selina Bramato und dr Yanik Lüdi, d Silber respektive d Bronzemedaille gwunne hei und sech somit füre Kantonalfinal in Biel qualifiziert hei. D Chind hei trotz am Hudduwätter ihres beste gä und sech nüt loh ahmerke ungerem umfunktionierte Sunneschirm.

Dr 3. und letzt Wettkampf isch dr UBS-Kids Cup in Lyss gseh, die 13 Kind hei i jedere Disziplin ihres beste gä und am Schluss het dr Lukas Bramato si erst Podestplatz dörfe fiire

Am Sunntig dr 24. Ougust heimer üs fröh am Morge am 5:45 in Safnere vouer Vorfröid troffe. Obwous so fröh isch gseh isch, d Stimmig vo Anfang ah super gseh im Car. Mit Stadt Land Fluss organisiert vor Anja und angerne Spili isch d Zyt schnäu verbi und mir hei dr Europapark scho vor Parköffnig erreicht.

Nach dr Gruppeiteilig undem obligatorische Gruppofoti simer ine Tag vouer Attraktionie und Abentüür gestartet.

Vo ruhige Mährlibahne bis zur neue Voltron hets für jede öppis derbi gha.

Uf dr Heifahrt heimer müed ufne unvergässlechi Jugireis zrugg gluegt

Merci für aui wo hei ghulfe das so öppis isch müglech gseh. D Rückmäudige vode Chind und Eutere hei für sich gsproche.

Chlei tänzerischer isches bim Soiree zue und här gange, mit de Programm Marry Poppins, Highschool Musical und Mamma Mia hei d Unger und d Oberstufe dr Stärnesaal ungerhaute und zum klatsche bracht. Grosse Dank ah d Leiter wosech Jahr für Jahr wider neu Programm usdänke. D Chind hei wie jedes Jahr grosse Spass am üebe und ah de Uftritt gha

Das Jugijahr isch wie jedesmau mittem gmeinsame Abschluss bire Cervela und Brot Schoggi und Mandarinli ds änd gange. Es paar vode Leiter heisech amne Tee gwidmet und es paar heisech doch derzu loh verleite bi «Röiber und Bulle» mitzmache.

Mir danke aune für das super Jahr und luege vouer Vorfröid ufs 2026

Hauptjugileiter Nicolas Mäder

Safnern, dr 31. Januar 2026